

- प्रधानमंत्री नरेन्द्र मोदी कया-संविधान म्हाको मार्गदर्शक है, जो समय री हर कसौटी माथे खरो उत्तर्यो है।
 - मन की बात कार्यक्रम मांय श्री मोदी कया बीत्या कुछेक बरसां मांय देश मांय मलेरिया रा मामला अर इण सूं होबा वाळी मौतां मांय 80 फीसदी ताई री कमी आई है।
 - राज्यपाल हरिभाऊ बागडे कृषि उद्यानिकी रे तैत प्राकृतिक खेती ने बढ़ावो देबा री अरज करी।
- प्रदेश मांय तेज ठण्ड अर शीत लहर रो असर जारी-आवता दो तीन दिन कुछेक ठोडां माथे घनो कोहरो छायो रहबा अर तापमान मांय गिरावट रा आसार।

000

प्रधानमंत्री नरेन्द्र मोदी कया के संविधान म्हाको मार्गदर्शक है, या बड़ा गर्व री बात है के भारतीय संविधान रा आवता बरस 26 जनवरी ने 75 बरस पूरा व्हे रिया है। आकाशवाणी माथे मन की बात कार्यक्रम मांय राष्ट्र ने संबोधित करता थकां श्री मोदी कया के संविधान समय री हर कसौटी माथे खरो उत्तर्यो है। वे कया के इण बरस संविधान दिवस रे मौके केई गतिविधियां सुरू व्ही है, जो पूरा बरस चालती रहवेला। श्री मोदी कया के संविधान री विरासत सूं नागरिकां ने जोड़बा खातर www.constitution75.com रा नाम सूं एक खास वेबसाइट बनायी गई है। वणां मन की बात रा श्रोतावां, टाबरां अर मोट्यारा ने या वेबसाइट देखबा ने कया।

श्री मोदी कया के आवता बरस 13 जनवरी सूं प्रयागराज मांय महाकुंभ होबा जा रियो है अर इण खातर संगम तट माथे जोरशोर सूं तैयारियां चाल री है। प्रधानमंत्री कया के महाकुंभ री विशेषता इण री विशालता रे सागे इण री विविधता भी है। वे कया के कुंभ एकता रो महाकुंभ भी है। श्री मोदी लोगां सूं महाकुंभ मांय भाग ले र एकता रा संकल्प ने मजबूत करबा ने कया।

प्रधानमंत्री कया के भारतीय एनीमेशन फिल्मां, रेगुलर फिल्मां अर टीवी सीरियलां री लोकप्रियता दिखावे है के भारत री क्रिएटिव इंडस्ट्री मांय कित्तो दम है। एनीमेशन बाबत श्री मोदी खुशी जताई के कृष, तृष अर बाल्टीबॉय, बच्चां मांय एक सुपरहिट एनीमेशन सीरीज है जिण रो दूजो सीजन बड़ा ही खास अंदाज मांय गोवा मांय अंतर्राष्ट्रीय भारतीय फिल्म महोत्सव मांय सुरू व्हीयो हो। इण ने दूरदर्शन रे सागे दूजा ओटीटी प्लेटफॉर्म माथे देख्यो जा सके है। आकाशवाणी सूं इण सीरीज रो प्रसारण हरेक दीतवार ने सुंवारे साढ़े दस बज्यां करयो जावे है।

प्रधानमंत्री कया के विश्व स्वास्थ्य संगठन री रपट रे मुजब बरस 2015 सूं 2023 रे दौरान भारत मांय मलेरिया रा मामला अर इण वजह सूं व्ही मौतां मांय अस्सी फीसदी ताई री कमी आई है। श्री मोदी मलेरिया री रोकथाम करबा खातर हरियाणा रा कुरुक्षेत्र जिला रा मॉडल री भी सरावणा करी।

प्रधानमंत्री विश्व री प्रसिद्ध विकित्सा पत्रिका लेंसेट री बातां भी साझा करी, जिण रे मुजब भारत मांय कैसर रो ईलाज टेम माथे सुरू करबा री संभावना काफी बढ़ गयी है। वे कया के टेम माथे ईलाज सुरू करबा रो मतलब है के तीस दिन रे भीतर कैसर रोगी रो ईलाज सुरू व्हे जावे। इण माथे आयुष्मान भारत योजना बड़ी भूमिका निभाई है। इण योजना री वजह सूं 90 फीसदी कैसर रोगियां रो ईलाज टेम माथे सुरू व्हे सक्यो है।

000

प्रदेश री न्यारी-न्यारी ठोडां माथे प्रधानमंत्री नरेन्द्र मोदी रा मन की बात कार्यक्रम ने उच्छाव रे सागे सुण्यो गयो। मुख्यमंत्री भजन लाल शर्मा जयपुर मांय आपरा निवास माथे मन की बात कार्यक्रम सुण्या। इण दौरान राज्य मंत्रिमंडल रा केई सदस्य अर केई विधायक मौजूद रिया। किशनगढ मांय केंद्रीय कृषि राज्य मंत्री भागीरथ चौधरी आपरा रेहवास माथे कार्यकर्तावां रे सागे मन की बात कार्यक्रम सुण्या। बारां जिला रा सगळा मंडलां रा बूथ अर शक्ति केन्द्रां माथे भाजपा कार्यकर्ता अर पदाधिकारी मन की बात कार्यक्रम सुण्या।

000

लोकसभा अध्यक्ष ओम बिरला आज आपरा संसदीय हलका कोटा-बूंदी रा दौरा माथे रिया। इण दौरान वणा केई कार्यक्रमां मांय शिरकत करी। कोटा मांय पेंशनरां रा सालाना जळसा ने संबोधित करता थकां श्री बिरला कया के पेंशनर्स ने आपरा अनुभव रो फायदो समाज रा लोगां ने देणो चाहिजे। श्री बिरला लोगां सू शहर ने साफ-सुथरो अर हर्यो-भर्यो बणाबा ने कया।

000

राज्यपाल हरिभाऊ बागडे कृषि उद्यानिकी रे तैत प्राकृतिक खेती ने बढ़ावो देबा ने कया। वे कया के कृषि विश्वविद्यालयां कानी ऊं देश मांय बिना कैमिकल री खेती खातर वातावरण बणाणो चाहिजे। श्री बागडे उद्यानिकी फसलां ने बचाबा माथे जोर दिया। श्री बागडे आज अखिल भारतीय कृषि विश्वविद्यालय कुलपति संघ री कानी ऊं "उद्यानिकी फसलों के संरक्षण" विषय माथे राखी 16 वीं राष्ट्रीय संगोष्ठी ने संबोधित कर रिया हा। वणा कम पाणी सू होबा वाळी फसलां अर फसलां ने कुदरती आपदा सू बचाबा खातर सगळी भांत री कोशिश करबा माथे जोर दिया। वणा सगळा कृषि विश्वविद्यालयां मांय सौर ऊर्जा उत्पादन खातर जरूरी रूप ऊं काम करबा ने कया। राज्यपाल जान्या-मान्या कृषि वैज्ञानिक स्वामीनाथन कानी ऊं साल 2008 मांय प्रस्तुत कृषि सुधारां खातर बणी समिति रा सुझावां माथे चर्चा करता थकां कया के लाभकारी खेती खातर केंद्र सरकार लगातार काम कर री है।

000

जयपुर मांय काल राजस्थान में मौसम एवं जलवायु सेवाएं विषय माथे कार्यशाला जा री है। भारत मौसम विज्ञान महकमा रा थापना रा डेढ़ सौ बरस पूरा होबा रे मौके राजस्थान इंटरनेशनल सेंटर मांय या कार्यशाला व्हेला। मौसम केन्द्र जयपुर रा निदेशक राधेश्याम शर्मा बताया के मौसम विशेषज्ञां अर हितधारकां रे बीच संवाद ने बढ़ावो देबा अर मौसम अर आपदा री पैली सूचना देबा रा लगस सू या कार्यशाला राखी गई है।

0000

प्रदेश मांय पश्चिमी विक्षोभ रा असर मांय कमी आबा रे सागे सर्दी रा तेवर तीखा व्हे गया है। लारला चौबीस घंटा मांय राज्य रा पूर्वी हलका मांय कठे-कठे छितराई बिरखा दर्ज करी गई। वठी ने केई ठोडां माथे सुंवारे घणो कोहरो छाये रियो। राज्य मांय सब ऊं कम 4 दशमलव 1 डिग्री सैल्सियस तापमान सिरोही मांय दर्ज कर्यो गयो। चूरू अर श्रीगंगानगर मांय 6 दशमलव 4 डिग्री सैल्सियस कम ऊं कम तापमान दर्ज कर्यो गयो। झालावाड़ अर बारां जिला मांय दो-तीन दिन पाछे हल्की धूप निकळबा सू लोगां ने थोड़ी राहत मिली। श्रीगंगानगर जिला मांय मावठ रे पाछे मौसम रा मिजाज मांय बदळाव आयो है। घना कोहरा अर तेज ठण्ड सू जनजीवन माथे असर पडयो है। बत्ती जाणकारी म्हाकां खबरनवीस सू-

लारला दिनां झुंझुनूं जिला मांय व्ही मावठ सू काश्तकारां रा चेहरा खिल गया। कृषि विशेषज्ञ गौरव शर्मा बताया के इण मावठ सू फसलां ने घणो फायदो व्हेला।

मौसम केन्द्र जयपुर रे मुजब आवता तीन—चार दिन तेज ठण्ड अर शीतलहर मांय बढ़ोतरी रा आसार है। आवता दिनां मांय राज्य रा कुछेक हलकां मांय घणो कोहरो छायो रहवेला, जिण सूं तापमान मांय 3 सूं 4 डिग्री सेल्सियस री गिरावट व्हेवण रा आसार है।

000

नया साल रा स्वागत खातर प्रदेश री सैर—सपाटा री ठोडां माथे इण बगत बड़ी संख्या मांय सैलाणी पूग रिया है। इण ठोडां माथे सैलाणियां री आवक ने देखता थकां प्रशासन री कानी ऊं खास इंतजामात कर्या गया है। दूजी कानी होटल कारोबारी सैलानियां ने रिझावा मांय कोई असर नी छोड़ रह्या है।

000

न्यूयॉर्क मांय भारत री ग्रैंडमास्टर कोनेरू हम्पी इंडोनेशिया री इरीन सुकंदर ने हरा र विश्व रैपिड अर ब्लिट्ज चैंपियनशिप रो खिताब जीत लीनो । हम्पी 11वां फेर मांय 8 दशमलव 5 अंक हासिल कर होड़ मांय जीत हासिल करी। प्रधानमंत्री नरेन्द्र मोदी वर्ल्ड रैपिड चैंपियनशिप जीतबा माथे कोनेरू हम्पी ने बधाई दीनी। एक सोशल मीडिया पोस्ट मांय श्री मोदी हम्पी री सरावणा करता थकां कया के वां रो धीरज अर प्रतिभा लाखों लोगां ने प्रेरित करेला। बतायो जावे है के हम्पी, चीन री जू वेनजुन रे पाछे ओ खिताब एक सूं बत्ती टेम जीतबा वाली दूजी खिलाड़ी बण गयी। वणा इण सूं पैली बरस 2019 मांय जॉर्जिया मांय या होड़ जीती ही।

000